

「聲輝」小老倌

赴加演出報捷

月前，由會長芳雪瑩及導師劉惠鳴帶領著一班聲輝粵劇推廣協會的學員，遠赴加拿大作交流演出，一班活潑天真的小老倌，由於演技認真，天資聰穎，博得當地觀眾熱烈好評。上星期日（8月26日），芳雪瑩特於「聲輝」內舉行「加拿大演出分享報告會」，出席者除了她及導師劉惠鳴外，當然不少得一班今次有份到加拿大演出的學員們及家長們啦。

文：小福星

異國文化擴闊視野

去完加拿大之後，學員們每個人都有不同的感想，現場見小朋友們非常踴躍發表感想，首先是陳錦文小朋友的感想：「原來要做一場表演是談何容易呢！兩天演出同埋一天工作坊，終於完滿結束，大家都鬆一口氣，但係兩位老師同埋幾位家長亦因粗勞過度而病倒，我內心真係感到好不安，因此激發咗我，現在除咗畀心機讀書之外，仲要學好粵劇，認識多啲粵劇上嘅知識包括：幕後、戲服，希望下次再有機會演出時，喺後台可以為佢哋分擔。」

至於唐君傑小朋友則認為今次加拿大的回憶是既快樂，又傷感，他說：「大家都有各自要求，但有共同目標。明顯嘅成果係有賴每晚只睡3、4小時嘅老師同不計較嘅加國有心人，冇佢哋嘅辛勤，就冇我哋嘅成功。今次旅程不單擴闊了社交圈子，而且亦學咗好多異國文化，令人回味。」

這次赴加的文化交流，很多小朋友都認為得著比想像中的多，例如張晉浩便這樣說：「今次得到嘅嘢，係千金難買嘅心靈成長同文化水平嘅提高，此外，一段段異國友誼，令我哋擴闊咗人緣關係，這對將來到外國讀書或公幹有一定幫助。冇諗到今次加拿大之行，雖然只係短短13日，竟然可以學到咁多書本上有嘅，而又對人生非常重要嘅知識。」

●「聲輝」成班人咁遠去到加拿大，理所當然嚟張大合照啦。



●劉惠鳴（右一）及芳雪瑩（左一）帶領學員們演出，後台合照。



成功推介粵劇藝術

而另一位小朋友陳慧筠表示她在整個旅程中，令她感受最深刻的，就是「粵劇工作坊」，她說：「講解同試穿環節讓生長外國嘅中國小朋友，真正接觸到粵劇，他們試過戲服同頭飾後，真係好雀躍，喺同佢哋交談當中，佢哋都紛紛表示有興趣學習粵劇，工作坊成功地把中國的藝術向海外的小朋友推介，我作為『聲輝』文化交流大使的一員，都感覺沾得一點光榮，希望日後能努力學習，為『聲輝』多作一點貢獻。」

「遺民淚，淚如江水流成海……」這場李後主《去國歸降》是加港交流演出的最後一場，不論台下觀眾有幾多讚賞或批評，但師生的演出，台上演員的淚水，都是發自真情。曾卓鴻小朋友深情表示：「呢啲淚水唔單止係對劇情嘅自然反應，更是對加拿大人、事、物嘅不捨，失落之情，亦隨著一湧而出，一個多月的辛勤練習，10多天快樂相處劃上句號，但留喺我中心嘅都係美好回憶，這些集體回憶，令我們雖然身在香港，依然情繫加拿大。」